

Prome Minister Evelyn Wever-Croes (MEP) :

Ley di screening di ministers



E pilar number 8 pa sigura integridad na Aruba ta e screening di minister. Lamentablemente, Prome Minister Evelyn Wever-Croes a duna di conoce, e ley aki no a wordo aproba pa Parlamento. E ley aki a wordo traha door di Departamento di Legislacion y Asunto Huridico, DWJZ, y a bay Raad van Advies 2 biahia y asina mes Parla-

mento no a pasa e ley aki. Premier Wever-Croes a gradici Parlamentarionan Vrolijk y Tjon pa e iniciativa y a gradici Fraccion di MEP y POR cu a sostene e ley aki cu lamentablemente no a conta cu sosten di un mayoria.

“E ley di Screening di Minister ta hopi urgente y necesario, no pa tene esunnan cu

ta uza substancia for di politica, pero pa tene esunnan corrupto for di politica. Mas sigur e ley lo pasa si, sino ta den e Gobierno aki, e lo pasa den e siguiente Gobierno”, Prome Minister a vocifera den e reunion publico den Parlamento pa trata e tema di integridad.

Mientras tanto tin e ‘landsbesluit’ cu ta regla e screening, pero no ta bay asina leu manera e ley. E ley lo a haci e trabou di cualkier formado den futuro hopi mas facil pa tene esunnan corrupto afo di gobierno.

Prome Minister a enfatisa cu su persona ta uza e landsbesluit pa screen tur minister a base di e mesun landsbesluit. Tur minister a pasa door di e mesun screening. Algun a bay lihe, otro nan a tarda, debi cu nan tin mas cos pa splica.

Pero tur a pasa un screening hopi intensivo. E screening aki no tabata solamente pa e candidato, sino pa su pareha, su mayornan, y su yiunan si en caso nan ta mayor di edad. E landsbesluit ta bay hopi leu caba, pero tin cierto puntanan cu no por wordo en forsa pa motibo cu e no ta un ley, e ta un landsbesluit. P’esey e ley aki ta asina necesario. Tur instancia cu ta asisti e formado den un screening a pidi pa haci esaki den un ley p’asina por defini e autoridadnan mas miho y p’asina por efectua screening y mara conclusionnan mas fuerte na nan.

“Lamentablemente e discusion a draai rond di cu si un hende cu a uza droga den subida, por bira minister of no. Mientras e discusion mester a enfoca riba corrupcion y si Aruba kier hende

corrupto como minister si of no”, Prome Minister a bisa.

Prome Minister a bisa cu su persona lo sigui traha cu e landsbesluit manera el a bin ta haciendo, tanten cu e ta encarga.

Mi a desea si cu e parlamento aki a aproba e ley y cu e maneho diesun cu bin despues di mi mas facil y segura cu no lo tin casonan nobo di parhanan manera Ibis, Avestrus y Flamingo. Tantén e ley aki no bin, Gabinete Wever-Croes no por garantiza cu no tin un caso prikichi of pauwis na caminda. Mi ta sigur cu si no ta e Parlamento aki, ta e siguiente Parlamento ya cu futuro generacionnan ta kere den integridad di berdad y nan si lo muestra sin miedo y sin duda di ta contra corrupcion.”

Prome Minister Evelyn Wever-Croes (MEP) :

“Mi deseo ta pa laga nos pais mas fuerte y mas integro cu mi a hay’e pa nos ciudadanonan tin confiansa bek den nan Gobierno”

Integridad

“Na fin di dia mi deseo ta pa laga nos pais mas fuerte y mas integro cu mi a hay’e den gobernacion, pa nos ciudadanonan tin confiansa bek den nan gobierno, y pa tur nos muchanan y hobennan tin oportunidadnan igual y no mester depende di un padrino den gobierno pa un tereno of un trabou”, Prome Minister Evelyn Wever-Croes a expresa na final di su discurso den e reunion publico den Parlamento na comienso di e siman aki.

Prome Minister a indica cu e lucha di integridad no tabata uno facil. Ya desde mei

2014, Fraccion di MEP a publica e nota ‘Integriteits het juiste doen, ook alsniemand kijkt’. E di dos nota a ser publica na februari y 2015. Pues for di oposicion Fraccion di MEP a cuminsa cu e lucha aki. A cuminsa na inventarisa kico Aruba mester haci pa cana e caminda di integridad. A inventarisa tur e leynan cu mester bin na vigor pa Aruba por yama su mes un pais cu ta respeta su mes cu ta haci lo corecto, hasta ora ningun hende ta mira.

“Temporada cu mi tabata den oposicion, cada biahia mi a papia di e topico di integridad, sea na Aruba, Corsou, Sint Maarten of na Hulanda,

oponentenan politico cu tabata tapa corrupcion den gobierno, ta manera rabia manera loco. Nan a purba silencia mi di tur forma. Pero mi no a give up. Dicon? Pasobra mi ta wordo guia pa e pensamiento cu e fundeshi pa un exito balansa ta honestidad, caracter, integridad, fe, amor y lealtad. Despues di 6 aña den e lucha di integridad, awe mi ta satisfecho di con leu e esaki a yega. Mirando bek atras mi ta realisa cu bringa pa integridad ta pan di cada dia di cada minister”, Prome Minister a expresa.

Gabinete Wever-Croes ta tuma accion pa para actonan cu no ta integro, y a empodera hefenan di departamento ya cu ta nan tin e responsabilidad den prome instante. Mirando atras por wak un BIA cu ta un soño cu ta birando realidad, Ley di Integriteits kamer, Corporate Governance Code, Cambio di ley di Contabilidad, Ombudsman, National Integrity Scan, Financiamiento pa partidonan politico, Empodera y fortifica institucionan halto di estado.

“Tur esaki no tabata te’y 3 aña pasa. Claro cu Aruba a wordo afecta pa Covid y pa e motibo aki Gabinete Wev-

er-Croes no por a yega mas leu cu tur e proyectonan aki pero sigur ta satisfecho cu tur loke a logra te awor. Gabinete Wever-Croes ta luchando pa bin cu e ley nobo di destaho cu actualmente ta den ehecucion, pa finalisa institucion di Integriteits kamer, National Integrity Scan, cambio di constitucion pa incorpora Ombudsman y Screening pa ministernan.

Si no ta e Parlamento aki, ta e siguiente cu si kier demostra cu hecho cu e ta contra pa hendenan corrupto dreña den gobierno y logra cu e Tratado di Nacionnan Uni

contra corrupcion, pa esaki conta pa Aruba tambe den su totalidad. E meta final di tur e proyectonan aki ta pa cada ciudadano tin confiansa bek den su gobierno. Gabinete Wever-Croes no a yega asina leu di logra tur esaki, pero ta riba e bon caminda.

Hendenan ta papia di djey ta pone atencion. E caminda di bida ta duna integridad na esun cu ta uni su mes cu integridad. E caminda di bida ta duna fracaso na esun cu ta uni su mes cu fracaso”, Prome Minister a bisa pa finalisa su discurso den Parlamento pa trata integridad.

Bista Politico

Bista Politico ta un seccion di Bon Dia Aruba especialmente pa brinda oportunidad na tanto partido politico como politico individual pa expone nan opinion. Contenido publica di ningun manera ta refleha opinion di Bon Dia Aruba y ta pa responsabilidad exclusivo di e organizacion/individuo cu ta ofrece esaki pa publicacion. Bon Dia Aruba ta reserva e derecho di no publica texto ofreci, si esaki segun e medio no ta cuadra cu e normanan di decencia cu nos ta mantene, pa evita contenido cu ta innecesariamente ofensivo. Esaki suheto na evaluacion exclusivo di Bon Dia Aruba.

